

## RETNINGSLINER TILDELING AV DRIFTSSTØNAD FRÅ SVEIO KOMMUNE TIL LAG OG FORSAMLINGSHUS

### Generelt

Kommunestyret set årleg av ein sum på budsjettet, for tida under post 14490. Løyvinga på denne posten kan nyttast til stønad til drift og oppstart av lag og forsamlingshus innan kommunen. Tilskott er avgrensa til den summen som er avsett i budsjettet, jfr. kommentardelen.

### Kven kan søkje?

Alle foreiningar, lag og klubbar som driv med førebyggjande og aktiviserande arbeid i Sveio kommune, basert på frivillig arbeid og i tråd med dei vedtekne retningslinene, kan søkje tilskott. Laget må vera registrert i «Friskus» ([www.sveio.friskus.com](http://www.sveio.friskus.com)).

Tilskotta har som siktemål å stimulera aktiviteten i lag og organisasjonar.

For Hovudutval for oppvekst og kultur er det ein særleg målsetjing at alle grupper av befolkninga får eit reelt tilbod om aktivisering i si fritid og ein vil derfor ta særleg omsyn til aktivitetstilbod for barn, unge, og eldre når tilskott skal fordelast.

### Det blir stilt følgjande krav for at ein organisasjon generelt skal ha rett på tilskott:

- organisasjonen skal ha minst 10 aktive medlemmer/deltakarar som er busette i Sveio kommune. Medlemstalet skal kunna dokumenterast.
- Organisasjonen må ha eit demokratisk vald styre.
- foreininga/laget skal yta ein eigeninnsats på minimum kr. 100,- pr. medlem pr. år. (Med eigeninnsats meiner ein m.a kontingent, gåve, kollekt og arbeidsinnsats)
- ha minst 8 møte/tilstellingar pr. år
- organisasjonar og forsamlingshus må vera opne for alle og ikkje stenge ute grupper eller einskildpersonar grunna religion, etnisk bakgrunn eller politisk syn.
- Organisasjonar frå andre kommunar og interkommunale organisasjonar får normalt ikkje tilskott frå ordninga. Unntaket er der organisasjonen har ein vesentleg del av medlemsaktiviteten sin i Sveio, og krava elles er oppfylt. Støtte vil då bli tildelt ut frå talet på medlemmer i Sveio. Lag som ikkje har aktivitet i kommunen har ikkje rett på støtte.
- unntak frå desse reglane kan gjerast i spesielle tilfelle.

### Hugs:

- alle underavdelingar i foreininga/laget skal fremje sine søknader gjennom sitt hovudstyre, dersom slik finst i kommunen.
- Sveio kommune – kulturavdelinga, har til ein kvar tid rett til å undersøkje om grunnlaget for tilskott er til stades og korleis løyvde midlar blir nytta.
- Sveio kommune har vedteke at lag, foreiningar og organisasjonar som mottar tilskott frå kommunen, må akseptera "Følgjekortordning for funksjonshemma" ved arrangement i regi av laget, foreininga eller organisasjonen.
- i høve der ein får utbetalt midlar på feile premisser, blir mottakar ansvarleg for tilbakebetaling.

- Det er ein føresetnad at laget/forsamlingshuset følgjer alkohollova ved eigne arrangement, og tek ansvar for at andre brukarar av forsamlingslokalet gjer det same. Ved grunngjeven mistanke om alvorlege brot på alkohollova kan søknad om støtte bli avslått, eller utbetalt støtte bli kravd tilbakebetalt. Døme på alvorlege brot er arrangement der mindreårige har tilgang på alkohol, eller at det pågår skjenking utan at det er søkt skjenkeløyve.

### **Forsamlingshus:**

Til delvis dekking av utgifter til eigne/ leigde lokale/ anlegg kan det løyvest stønad etter nærare vurdering av utgiftene. Lag som nyttar eige lokale sender ein samla søknad som støtte til drift av laget og bygget.

Det kan ikkje gjevast stønad etter denne ordninga der samfunnshusa vert drivne som del av skulebygg og dermed får ein stor del av driftsutgiftene dekkja over skulebudsjettet.

### **Høve der ein ikkje har rett på tilskott**

Unnateke frå nemnde reglar er:

- foreiningar som blir drivne på forretningsmessig basis.
- organisasjonar som har til oppgåve å ta vare på medlemmene sine yrkesmessige interesser, til dømes aktivitetar knytt til bedrifter.
- konfirmasjonsførebuingar o.l.
- paraplyorganisasjonar med medlemslag i fleire kommunar, eller regionale lag som dekkjer fleire kommunar.
- reine interesseforeiningar
- foreiningar/lag som arbeidar aksjonsprega eller der foreiningar/lag kan forventast å ha relativt kort levetid
- organisasjonar som får anna driftstilskott, til dømes kyrkjesamfunn har ikkje rett på ordinært driftstilskott, men kan søkja på andre ordningar

### **Om sakshandsaming**

Alle søknader om tilskott skal skrivast på eige skjema og sendast til kulturavdelinga. Etter at søknaden er handsama, skal søkjar ha skriftleg melding om vedtaket som er gjort.

For vedtak gjort administrativt av kulturavdelinga etter delegasjonsfullmakt, er hovudutval for oppvekst og kultur klageinstans.

### **Mangelfulle søknadar**

Søknadar med manglar og for seint innsendte søknader vil normalt ikkje bli handsama.

Vedlegg kan ettersendast inntil ein månad etter søknadsfristen. Det må opplysast om dette i søknaden. Det blir ikkje sendt ut purring på manglande vedlegg.

### **Opplysningar om andre offentlege tilskott**

Det skal førast opplysningar i søknaden om:

- alle offentlege (kommunale, fylkeskommunale og statlege) tilskott siste år, type og storleik
- om det blir søkt om andre tilskott dette året og til kven

## **Organisasjonar med underavdeing**

Søknadar frå underavdelingar/avdelingar/grupper skal setjast fram gjennom hovudstyre til hovudorganisasjonen i prioritert rekkjefølgje. Denne prioriteringa skal vera underskriven av leiar.

### **Startstønad:**

Det kan gjevast eingongsstønad til start av nye lag.

Føresetnaden er at det er vald eit styre/interimsstyre, at laget er ope for alle og har minst 10 aktive, betalande medlemmer.

Reorganisert lag kan få startsstønad når drifta vert teken opp att etter minst 3 års stans. Startstønad må søkjast om på same måte som støtte til drift av lag og forsamlingshus, og vil bli tatt frå same potten.

## **Søknads- og handsamingsprosedyre**

Løyvingane vert utdelt ein gong i året, og fastsett søknadsfrist skal lysast ut i lokalavisa og på kommunen sin nettstad/facebookside. «Friskus» vil òg bli nytta til formidling av informasjon.

Søknadene skal sendast på fastsett skjema og til fastsett frist. Særlag og undergrupper skal fremja søknadene sine gjennom hovudlaget. For seint innkomne eller mangelfullt utfylte søknader kan verta avslegne. Urette opplysningar, eller brot på retningslinene for stønad, fører til tap av rett til stønad i minst eitt år.

Kulturavdelinga har fullmakt til å dela ut midlane i samsvar med gjeldande delegeringsreglement. Før utdeling skal søknadene som kjem frå dei aktuelle laga sendast til Idrettsrådet i Sveio og eventuelle andre felles rådsorgan der slike finst. Råda har høve til å komma med uttale til fordelinga av midlar.

## **Vektlegging ved deling av midlar**

Driftsstønad vert gjeven til frivillige lag og organisasjonar som driv kontinuerleg verksemd i kommunen, slik det er nedfelt i dei generelle retningslinene. Arbeidet mellom barn og unge skal ved tildeling prioriterast særleg høgt.

Ved tildeling av tilskot skal det elles leggjast vekt på:

- talet på aktive, betalande medlemmer, med særleg vekt på barn og unge. Dokumentasjon av medlemstal og alder på medlemene skal følgja søknaden. For medlemmer av NIF kan utskrift frå NIF sitt register nyttast som dokumentasjon.
- Aktivitetsnivå i organisasjonen. Det tel positivt om organisasjonen òg skapar aktivitet for andre enn medlemene.
- vurdering av årlege utgifter (dokumentert med rekneskap og budsjett)
- om eit lag driv særleg kapitalkrevjande aktivitet
- behov for ekstra stønad til særleg svake grupper
- inkludering av alle grupper av befolkninga

Unntak frå reglane om betalande medlemmer og vald styre kan gjerast for sundagsskulane og ymse barneforeiningar.

Søknadsfristen er 1. april. Frist for ettersending av vedlegg er 1. mai.

*Retningslinene gjeld frå 01.01.2021*

*Vedtatt av Sveio kommunestyre sak nr 088/20, 21.09.2020*